

author: Sommariva, Giuseppe <sec. 19.>  
title: Ai noeuf or de sira : seconda scena comica  
shelfmark: ZQ.3.128/02  
library: Biblioteca nazionale Braidense - Milano - IT-MI0185  
identifier: MIL0657693

Le riproduzioni digitali accessibili dalla Biblioteca digitale italiana di [www.internetculturale.it](http://www.internetculturale.it) sono per la maggior parte di dominio pubblico, e provengono dalle attività di digitalizzazione realizzate dalle biblioteche che possiedono gli originali e la proprietà delle riproduzioni digitali, e sono istituzioni partner del portale.

La riutilizzazione non commerciale è libera e gratuita nel rispetto della normativa vigente.

Ai fini della riutilizzazione commerciale e/o per ottenere un documento ad alta definizione contattare il detentore dei diritti del bene digitale utilizzando nel Download del documento, il contatto di posta elettronica.

Gli utilizzatori finali dei beni digitali, sia che reproducano parzialmente o completamente le immagini, dovranno sempre e comunque citare la fonte [www.internetculturale.it](http://www.internetculturale.it)

.....

The digital reproductions accessible from the Italian Digital Library [www.internetculturale.it](http://www.internetculturale.it) are mostly of public domain, and come from the digitization activities carried out by the libraries that own the originals and are ownership of digital reproductions, and are Institutions partner of the portal.

The non-commercial re-use is free in accordance with the local regulations.

To allow commercial reuse and/or to obtain a high-definition document please, contact the copyright holder of the digital object using the contact e-mail you can find in the Download of the document.

The terms of use of the Internet Culturale material states that the final users that reproduce images or part of them must mention the source [www.internetculturale.it](http://www.internetculturale.it)

**AI  
NOEUF OR  
DE  
SIRA**

**SEGONDA SCÈNA COMICA** 4

**DE  
GIUSEPP SOMMARIVA**

**Prezzi Cent. 35.**

**MILAN**

**DA GIOVANN MESSAGG**

**STAMPADOR E LIBREE**

*Centrada de Santa Margarita al N. 1211.*

### CON SO' PERMÈSS.

---

*Stoo opùseol el se mett sbtt a la tutèla di lègg  
in vigòr.*

Hii mai provaa, i mee sciori, dònn e òmen,  
a avègh di fastidi? ma ben intès de quii gròss,  
minga fastidi gràss? Per esempi la bollètta  
— on capiàtur per dèbet ai spàll — ona miec  
sull'àssa — ona moròsa che ve tradiss, cioè  
quand sii innamoraa de lee, e lee d'on alter:  
in trii — on tutòr ch' el ve mangia a œucc  
vedend el vòster sangu e che in gràzia de  
la vostra minoritaa, besògna tasè e mandà giò  
di strangojòn fina che la maggioritaa la vèn  
a liberàv?

Hii mai provaa de sti fastidi? --- E se i  
avii provaa ve pâr minga on refrigèri el trovà  
denter per denter ona distraziòn, specialmènt  
de nòcc, la mâder di pensêr?

Mi inœeu donca per distraziòn, e disi inœeu,

ve presenti stii quatter bambàn minga per fav stà allegher, ch'el saràv on insult, come fàn cèrti miseràbel quand se permèttèn de insultà alla misèria, ma purament per distràv on ciccìn.

In grazia de sta mia intenziòn ve preghi de passà sora ai difet de sti mee paròl bisläch e cialòn.



## I.

# EL PALAZZ

Dòpo ch'èm vist tutta la classa di biroeu in gràn trùscia a portà i beglièt d'invit, s'è savut che tucc i donn, quèi però che se senten a scarligà in di vèn quatter quàrt d'onza de sangu bleu, s'hin daa ona specie de randè voù foeura de Milàn per i noeuf òr de sira. Per tràtt de generositaa eren ammess anea cèrte alter, che ghe ne scolava giò quai onza mèn. — È staa scèlt, per assicurà l'assoluta e pièna indipendenza de sta uniòn, on palazz al pont de Górla. — A mèzz di, on bel giardin sporgent alla sponda del navili: a tramontàna, on viàl longh con ona filera d'ona pàrt all'oltra de piànt de pobbia: a mattina, el campanin de la Gesa: al nord, i campagn de melgòn e de stobbia de formènt. — (F'è el desnoeuf de Luj). El palazz l'è a on piàn sol; padròn, architètt e

capmàster, s' hin a pòsta desmentegaa de fabbrica el piàn terrèn, e de fagh el tècc — per conseguenza besògna montà su o con i àl, o in d'on ballòn — e besògna stà all'aria apèrta. — Palàzz emancipaa da tutt irègol, palàzz creaa in onôr e glòria de la libertaa. — L'appartamènt l'è illuminaa a gaz de luna. — Proibii in cièl per quèlla sira el passàgg di nivolòn — proibida la scalmana per no inaspà la vista ai Lòr Eccellènz — proibii el vent, e appena permèss on ciccìn d'arietta de quella cantada dai sopràn con la coa — Marlarbetta, che ventisèll! —

L'appartamènt l'è compòst *come segue*: ona gràn anticàmara in forma bislonga con di fiòrcamèli ross — picciuraa sul mür — el pittór l'è staa on sbianchin del pont Matalin — gh'è taccaa su on quàder rappresentant *Moncalv* vestii de dònnna con avèrt, e sbarattaa la bocca in atteggiamènt de cantà la soa ària « L'è » tanto temp che te spècci o birbòna. » — Gh'è di scàgn de bulgher in gir e di cardèghin de boeucc per el càs che ona quài sciora la menàss con lee di forestee fin de vùn o duu ànn. — Dòpo gh'è ona gran sala con di quàder de tutt i dònnn ermafodrit — gh'è di girandò de òr inargentaa col ràm, senza candir — no se vèd a pend su dal busseròt che on tochèl de mocusc. In mèzz, on gràn lampedari a quàtter gir,

de cristall coloraa de bellètt, trasparènt, taccaa su con on cordòn de cavèj biònd al nàs de la luna. — Scàgn, vis-a-vis, dormeuses, poltròn, cossin, cossinètt, sgabellin in abbondanza — on divàn alla turca l'è in mezz, e denanz ona specie de pulpìt d'alabàster. — De là de sto salòn gh'è on gabinètt, poeu ona ritirada, poeu ona stanza de lètt, poeu ancamò on oltra stanza con ona sortida — flüss e riflüss per la porta de dree. — È staa preveduu el càs d'on colp de stàt per pàrt del gèner mascolin — ona Sabinàda.

Stoo palàzz l'è staa creaa appositament per l'assemblèja generàl di dònnn de alto bòrdo, cioè de tucc quèi che dònden in del nòm — l'òr han voruu, prima de fa causa comuna coi cittàin e coi popolàn, han voruu intendes bèn fra l'òr titolaa, e per conseguenza han incaricaa on architettèssa, perchè han minga voruu dipènd dai òmmen; e in d'on bàtter d'oeucc prèst giò per el navili di borcèj de caleina acquistada in di fornàs de Cassàn — giò di quadrèj istessamènt in barchètt, còtt in la fornàs al pont de Sant'Agata — giò di legnàm de la sciostra del Ragazzòn a precepizi per el Brèmb, comprraa in l'ùtem pajès de la väll Brembava — giò tucc i muradorèss de Varès, de Indun de sora e de sòtt, de Malnaa, de Cazzòn, e del Gaggioeu — Chi ha tòlt l'appàlt

l'è stada la tosa d'on òst del Cantòn Tesin e propriamènt del Paltèng de Meli — ona svel-tona, la fuma com'è on soldaa.

El palàzz el doveva vess aristocràtich — el doveva minga toccà la terra per no sporcàss de pòpol — el doveva puttòst inclinà al cièl. — E inscì l'è staa faa — Stoo palàzz el someja, anzi l'è el pandàn de quell'incantaa de Armida — màrcia, spariss — su ona scèna, giò on'altra.

I spès per stoo palàzz hìn staa sostegnuu per azion de moneda sonanta. El bèl sèssò l'è pussee positiv — de càrta, e cartèll minga. — Di pèzz invece che sòna.

El palàzz, l'è quasi l'opera d'on miracol, op-pùr d'on istriamènt che è staa faa in del barchètt de Gorgonzoeula in l'istèss di, ch'el sciur C. A. l'ha proclamaa l'emancipazion di dònn — la stria l'eva ona dònn genovesa — l'ha reussii perfettamènt — calcina, quadrèj, le-gnàm, andàven a pòst de per l'òr.



## II.

### SÒNA I OR.

El mond a pòch a pòch el s'è indormentaa, e pàrli del mond pajsàn, perchè quel de la citta el ciciàra fin passaa mèzza nòcc — no se sènt che alla lontàna on quai càn a bojá — di ràn a cantà in faccia alla luna, sfaccia-dòn! - *ghè ghè ghè* — ona quai paisanèlla, che in dell' andà in lècc con la lùm in mán la ghe dà ona vioeula e la canta « *E chi no la godarà, tutta la nòcc sospira* ». — E poeu silenzi — appèna el sgìch sgiàch de l'a-cqua del navili che la batt adasi contra la riva. — Silènzi dappertutt. O mader natura, in stoo moment mi te contempli in tutta la toa immensità — te see majestosa, sovrumana. — Stoo silenzi — stoo bisbili sol di fràsch di piant, che se moeuvèn perchè ie fa moeuv on zefirèt che vèn giò da la Brianza, sta luna,

sti stèll che risplènden — sta càra malanco-  
nia che penètra in del me coeur, in l'anema  
mia, che me commoeuv e che quasi quasi me  
fa piang, hin tutt còss che me persuad come  
gh'abbien tòrt cèrti pajàsc, che creden, che el  
sol, la luna, i stèll, el cièl, l'aria, i nivol, el  
temporàl, i saètt, i terremòt e che so io, sien  
tutta ròba che se compra tutt i ànn alla fèra  
de Bèrgom o al mercaa de Sarònn. Tìree i  
ranghett, e pocu mel savariù di. — E quèst  
disi per incidènza.

Finalmènt el campanòn a uso campanèlla  
de Segnàn el sòna i vòtt e mèzza — Cito...  
se sent.... sì... l'è on lontàn freccàss de roeud,  
hin carròzz... no, no... al rumòr pâr di Om-  
nibus .... eppur, se comencia a vedè sul stradòn  
vèrs Lorèt... sì, sì carròzz... gh'è de la gènt  
a cavàll.... hin dòn. Cribbi! l'è cavallaria  
bell' e bòn, se sènt i squadròn a batt contra  
la sèlla. Cisti! anca di cannòn.

Dòpo on quàrt d'ora, pussee de cènt dòn  
arriven sul pont de Gòrla a cavàll — denanz  
gh'è ona Comandantèssa con on gràn baret-  
ton de pèl in testa — la gha on squadròn  
sfodraa — de dree trii canòn... per mangià el  
lattinèl — compra all'esposizion de Londra.  
— *Alt*, sbràgia sòtt vòs la Comandanta —  
Tuec se fèrmen e se mètten, in fila fasènd  
on circol intorna alla rotonda del pont —

Madàma la Generala, ehe per quant hoo sa-  
vuu l'è ona Contèssa Provinciala, ma de quì  
pròpri nùmer vùn, la va in mèzz e la dis  
con ona vòs tra el contràlt e l' mèzz so-  
pràn » Nobili camerate, noi sèm arrivate  
» chi inscì felicemènt. — Viàltre tùcc sa-  
» pete che stassera ai nœuf ore dèu con-  
» vocàss in sto nuovo palazzo il nostro sesso  
» di rango nobile per decidere cossa se possa  
» fa nel grave argomento della nostra emanci-  
» pazion e in presenza delle pretese dei no-  
» ster tirànni, i òmen, gioven e vecc; e in  
» confront di pretensión che alzaràn su stoo  
» propòset i dòn cittadìn, e quèl che fa pus-  
» see tremare i donnàsc del volgo. Noi ci  
» siamo armate. »

» La nostra missione l'è quèlla de garantì el  
» nobil parlamento femminino da ogni contra-  
» ria sorpresa — missione patriotica. —  
» Dunque venti di voi starammo di guardia  
» al palazzo — altre trenta pattuglieranno  
» in lough e in làrgh per el stradòn da Lo-  
» rèt e Sèst. — Tutt i carròzz, vittùr, càrr,  
» carrèt che vegnèssen da sta pàrt saràn stra-  
» vacaa giò per el navili. — Nel caso che on  
» qualche sfacciatone di uomo el vorèss nodànd  
» penetrà in mezzo a noi, nun capitolarèm  
» per prudenza. Nobili camerate siete tutte di-  
» sposte a sostenere colle armi e con la vita, se

12 -

» occòrr, i noster deritt contra i òmen e i nò-  
 » ster marchesaa contra la borghesia e la pleba?  
 » — Lo giuriam. — Responden tucc sti dòn de  
 cavallaria a ona vòs sola. — Màsc. — Tutt a on  
 tràtt stoo pelotòn de dòn a cavàl e de artiglieria  
 el se mœuv — ognùn va al sò pòst. — Dessa-  
 dèss a gràn galòpp arriva ona staffetta fem-  
 minila a cavàll — l'è ona giovena nobila, ma  
 de quii nòbil vegnuu al mèn — l'è vestida  
 de postìona. La cerca cunt subet de la sciora  
 Comandanta che l'eva andata on momentin...  
 prèst la ghe consègna on despàcc. — La  
 sciora Comandanta la tàja su, la dèrva el plich  
 e al lusòr de luna la légg. » Alle ore nove  
 » precise noi discenderemo nel giardino —  
 » viaggiamo in varii palloni aereostatici —  
 » siamo in cento una, tra capitaliste, pro-  
 » vinciali e borghigiane. — Disponete e ve-  
 » gliate — La Marchesa Rosàura, decàna —  
 » Salute e Emancipaziòn. » — La Generala la  
 remonta a cavàll, la còrr a visità i pòst e a  
 schiscia di raccomandaziòn — intanta mada-  
 migèlla postìona l'eva desmontada e la s'era  
 settàda in giardin alla riva del navili a ciapà  
 el frèsch.

13

~~~~~

### III.

## DISCÈNDEN.

Tutt a on bòtt se vèd per ària dodes ballòn  
 — se vèd a sventolà di bandèr a trii colòr:  
 ross, scarlàtt e ponsò — se avisenen al pa-  
 làzz e adàsi adàsi giò all'appartamènt e foeura  
 voeuna dòpo l'altra tutt sti nobilèss. — Ona  
 sciora ingegnèra la dirigeva la flotta aerea, e  
 dòpo avè stravacaa foeura sti lustrissem, l'ha di-  
 rett tutt i ballòn inscìma del campanin del pajès.

Èntren tucc i dòn, e ghe n'era de vèce,  
 de mezza etaa, de giòven, e giovinètt, vèdov,  
 maridaa, e zitèll — fan a dò a dò l'ingrèss  
 nella gran sala, se sètten tucc — in mèzz se  
 sètta giò sul divàn turch la pussee vèggia, la  
 sciora Marchesa Rosàura. — Càven el capèl,  
 e se desmantiglien. — Quand tucc sti Dâm hân  
 fenii de commodàss, la sciora Marchèsa la se  
 alza, la monta sul pùlpèt d'alabàster, la tira



foeura ona scàttola d'argènt con su el ritratt d'on General francès, del temp di strivàj a trombin, la tira ona presa e poeu la se mett a dervi el consèss tegnènd el seguènt descòrs:

Càr i mee sciorin, incoeu l'è on dì per nùn de gràn solennitaa, se tràtta de la nostra libertaa, de la nòstra emancipaziòn. Fin'adèss i òmen n'hàn tiranneggiaa, n'hàn tegnùu sòtt. — L'è vegnuda omài l'época famosa de liberàss — de emancipàss dà sta tirannia — el nòster prim pensèr, la nòstra prima paròla, la prima nostra operaziòn la sia quèlla de avè pu a che fa coi òmen. . . . Ona popòla de desdòtt ann, con duu oeuce gris-bleu, lãgüid e maliziøs, la se mett a piang, la sgonfia el nàs con on fazzolètt bianch. — povera mi! la dis, com' hoo de fa mi a desmentegàm del Ragionàt de studi? — La Marchesa la seguita: Ma sta emancipaziòn la ghà di pericòl nell'attivàla — ghe voeur donca tutta la nòstra prudenza, la nòstra savièzza, e la nostra previdenza. Lòr deven ben savè che dal moment, che è staa prononciaa la paròla emancipaziòn femminina s'è sollevaa in di dònn borghès e del pópol di pretensiòn de eguaglianza, che deven certament sgomentà i nòster deritt de nobiltàa — i titol — i con-

venienz — e tutta quèlla dignitaa, respètt e ossèqui che ne se dèu. — Nun èm de emancipàss dai òmen l'è vera — pu de òmen, ma èm anca de conservàss nòbil, tal e quäl sèm . . . . Ona vòs in fond de la sàla la sbragia: Che superbia! — L'è minga superbia, ma l'è cura de conservá el fatt nòster. — E se mai nun molàssem on ciccìn, se vedarisssem confus prèst con la mercantèssa, con la modista, con la cervellèra, la becchèra, la madamin, l'ortolana, e con quaighedeuna d'alter che sa de paltàn. — Per tegniss perciò lontàn e dalla dipendenza di òmen, e dalla fratellanza di citadin, e plebèj, nùn se sèm radunaa chi insci per deliberà. — Chi de lór desidera parlá, se álzen in pee e veuma dópo l'altra dirà el so parèr; dopo mettarèm ai vòt i proposiziòn, e quèi che ottegnaràn la maggioranza suràn addottaa.

La sciora Marchesa la discènd dalla tribuna e la bòrla giò sul diván, tutta sudada — de càp a pè — fina che da quella nòbila societaa se alza ona sciora, — silenzi.

Sta sciora, e l'è ona cara vedovin, l'è de statura . . . . ona bell'asta de dònna, de circa trent'ann, pussee indree che innanz, cavej negher velutaa, sii folt e negher istèss — oeuce grand e anca lór negher — nasin profilaa —

bocca piscinina con duu làvor de coràll — faccia oblunga — barbòzz regolàr — dentadura bianca come nèv — colòr puttòst pàllid — fisionomia significanta. — Me desmentegava de di, che l'è anca ben fada de còrp, bona per servì de modèll. Sta sciora a pàss de matròna la va alla tribùna, la fa ona riverenza e peou la se mètt a predicà.

E fina a quand nùn dòn parlarém maa di òmen? e fina a quand . . . . Emancipàss dai òmen? sciocchézz! — bisbili in l'udienza. — I òmen ne dàn la dritta in strada, a tàvola, e quàighedùn anca quand dórmem — se vèm in carròzza, i òmen ne favorissen a dàn el bràsc e anca là la dritta. — I òmen a tavola ne sèrven per i prìm com'è i popò. — In tejàter i òmen ne cèden el pòst migliòr. — Se végnen in casa nostra i òmen coméncien a fàss anonciù — spèccen fin che a nùn pàr e piàs; dopo végnen innànz à tésta scovérta con el capèl in mán — fún ona riverenza abbassànd la bràva soa cràpa — se avistènen a nùn, che no se mèuvem, là settaa giò, immobil come statov; ne bàsen respettosamént la manina, e stàn là in pee drizz come füs fina che nùn se dègnem de digh: ch'el se còmoda — e allora se sètten giò semper col capèl in mán e semper rispettòs

vèrs de nùn, anzi obbligaa a fàn la cort, a din che sèm bèj anca quand sèm brutt — che sèm gioven anca quand sèm vécc — che ghém resòn anca quand disem di gran bestialitaa — ancamò bisbili in sèns divers — i veggian se dindònen sul scàgn, inquièt, malcontent. — La preopinanta la seguita: Se pœu sti òmen hìn innamoraa, ajùt, allora! — Lòr sòffren el frécc, el cald, sospìren, maccàren, corren, deliren — giò denànz à nùn in genuggiòn a implorà misericordia, perdòn . . . . Ona contessa la interromp disènd: Ona vòlta. — Tucc i tosan sbràgien: Anca adèss, anca adèss. . . . ma già, anca adèss. — L'oratora: — Preghi i mee dàm a interrompem minga — dappertutt zt, zt, zt, e pœu la va innànz: Nun dòn emancipass dai òmen? sì, sì, disen vint o trenta Dàm vécc. — Ah sì? bèn mi dimandaroo a tutt l'òr Lustrissem, se nùn podarisssem scusa senz'òmen? sì sì tòrnen à di quii veggian — tutt i alter in massa disen: no, no — i tosan e i vedov con pussee forza: l'è impossibel — Donca hìn anca lor, voltandes vèrs la maggioranza, del mé parér — Emancipass dai òmen? pover omen! l'òr che ne fan . . . . . i tosan: brava, brava — de poesia, de letteratura, de storia, de arti e de tutt còss

— l'or che ne procurèn tanti spass, . . . brava, brava, disen quasi tucc — meno i vecc — Diran, che nùn ém minga come i omen de maneggià la societaa, ma se vœurem nùn ghém on altra missiòn sublima al par de quèlla di omen — quèlla de creà i costùm — Brava da tutt i pàrt — Lassémegh pùr ai òmen el govèrno de la societaa, nùn ghe farém giò el sudòr — coi noster sentiment téner e sensibel modificarém ciòvè calmarém el sò ardòr — Vœuren fa el tiranno; nùn i tirarém a vess generòs, liberaj — vœuren vess avàr, nùn i farém diventà caritatevol — vœuren fa on ciccìn el de pu, el prepotent — nùn i farém diventà quiet, savi, ùmil e mansuett — vœuren fa el gingin, el cavalier servent, nùn . . . di vòs confùs: el cavalier servent sù — Ma quèst i mee Lustrissem sarav istèss che professà l'immoralitaa. Ona vòs desgarbada: Vej, che casta Susanna! — Chiunqua la sia che parla in sta manera la prevègni che se insulta nissun, e speri che la nobila adunanza la soffrirà minga . . . all'ordine del giorno grida una contèssa de settant'ann, all'ordine del giorno — Torna de cap on besbìli — l'oratóra la fa per andà innànz, ma no se vœur pu ascoltàla e da tutt i pàrt se sènt:

**abbass, basta, abbass.** Quèlla sciora che la credeva de avè tiraa quasi tucc quii nòbil donn al sò partii e de avè ottegnuu ona maggioranza in favòr di sò opiniòn, la s'è trovada al moment de la conclusiòn sconcertada e obbligada a tajà su la prèdica.

Se fa innanz on donnin, ben intès nòbil, certa donna Artemisia — la ghà vintott'ann, minga tanta grànda, ona smortòna, cùn i œucc gris, bionda, vestida de nègher, con ona scuffièta bianca, senza guarniziòn, domà con on bindèll negher lassaa sòtt al barbòzz — la va sul pulpit — la se sègna, la guàrda in cièl — se fa silenzi — la mètt i mân in cròs e pœu la dis:

Mi vostra umilissima serva, nanca dègna de basav i pee, ardissi de vegnù su stoo pulpit per vedè de mètt ona bona parola fra i dissident — l'è el sentiment de la caritaa che me spìng a sto pàss. In nòm di noster miseri dell'anima e del còrp ve preghi de dàm ascoltt. Perchè taccà lù? perchè mancà de civiltà in d'on moment che sèm chi per decid la nostra sort? — Tucc quii donn che se làssen lusingà da Belzebù... oh! sècol depravaa! oh! mond... de pasta frolla! — i tosàn fàn girà la lengua in bocca in atto de savori. — Emancipèmes dai òmen — formèmm de per nùn on govèrna —

— *formém de per nùn on autoritaa suprema. — Cito me raccomandàndi; addatèmes ai temp, formém dò càmer.... che spuzza!* dis ona cavaliera — *formém... brava l'emancipadora! ona vòs — on oltra abbàss la fintòna, abbàss bigottòna!* Donna Artemisia la se scond la faccia coi mân, la discend e la va al so pòst confusa.

Tutt i dònn se álzen in pee, cicciàren de per lór, no pòden andà d'accòrd. — Tutt a on tràtt se sènt à sonà la trombètta — vàn tucc alla finestra — l'è on altra staffetta femmena che arriva — la consègna on despàcc alla sciora Comandanta; la quàl la se mètt sòtt al poggiolòn del palàzz e ad àlta vòs la lègg » El Comitato » aristocràtich di dònn in contrada ecc. alla » sciora Comandanta la cavallaria in commissiòn prèss all'assemblèja de Gòrla. — A Pre- » còtt tutt i dònn cittadin e plebèj s'hin radu- » naa a l'ostaria del Perscim, e hân determinaa » de fa on ferayòust, esclùs i òmen — a sta » festa decideràn sul tu mi vieni de l'emanci- » pazion. — I òmen per rappresaglià voeuren » dichiarà vèdov tucc i dònn — anca i tosàn » che inclinàssen al sànto matrimóni.

L'è impossibel a descriv l'agitaziòn che prodùs la lettura de stoo despàcc — sàlta in mèzz ona eccellenza bèlla come on sò — viscola com'è on pèss e la dis: « El pòpol

» l'è semper pòpol — anca el pòpol fem- » minin el crèd de fa ona gran còssa a » mètt fœura de la lègg i òmen . . . l'è » minga quèsta l'emancipaziòn che i dònn » onèst intenden — addottànd quèsta saràv » istèss che la fin del mond — sicura de » sì, disen tucc. Donca propòni de fà on » appèl ai òmen invidàndi a divid con nùn » el potere e l'autoritaa — in càs de guèrra » lór andaràn a bàttes e nùn farèm filàper » — in càs de pericòl, provaa coi prœuv, de » la pàtria, anca nùn se batterèm. . . Evvive » Vostra Eccellenza! griden tucc spaventaa.



#### IV.

### EL TEMPORAL.

Tutt a on colp on bouff de vent el mett sott sôra la scima di piant — el ciël de bleu che l'eva el diventa nègher — la luna la se scônd e i stèll filen via e scomparissen — el stralüscia — el trôna.

I ballôn sul campanin se ägiten in tutt i pàrt per òpera del vènt — se rômpe i cord e via dal campanin i carròzz aereostàtich, trasportaa tucc in aria vèrs Monscia — se pèrden sùbit alla vista, salvo de vedèj a volà ogni voeulta che guizza el lãmpo.

Tucc i eccellènz, i sciorii illustrissem hin là per ària all'avèrta; no pòden andà su, nò poden vegnì giò — *ajut per caritaa! ajut!* esclàmen tucc con i mân in di cavej — i veggiàn hin svegnuu — sàlten per i scàgn in grazia di convulsión, nanca on cicc de asee

de fagh usmà — i tosàn alla finestra a sgavasgià e a gòd de stoo contrattèmp — quai-veuna divóta, in genoeucc in cantón a pregà — i dònne de spiret in mèzz a la sàla a pensà a salvàss.

La cavallaria femminina l'è montada in sella e via dritta a Milán — per vergògna l'è vegnuda denter dal daziètt passànd de sòra al bersàli.

Comencia a vegnì giò on gottón d'acqua a uso àqua gelada o tempèst — de bèll noeu in la sàla dell'assemblèja se cria: *ajut! misericordia! perdon! esùs per i viv! esùs per i mòrt!* —

I omen d'ona pellattaria per contra senza savè da còssa se tràtta, avend olter sentuu a dì che quèl palàzz el doveva per proeuva vèss tiraa su in di nivol sott a la proteziòn di prim Damàzz de la Lombardia — han sentiü compassiòn de ste lamentànz, e prèst con di scàl a man, tal e qual se trovàven, in manega de camisa, a pee nud, impiastrea de conscia de pèll — su per el palàzz —

Giò ona slénza de quèj ma . . . el pariva el deluvi. — La decàna de quèlla nobila assemblèja l'è stada la prima a lassà indree i convulsión e saltà in brasc del prim òm ch'è arrivaa alla finestra — l'eva scür com'è in bôcca al louff — ciàpa ti che ciàpi anca mi — la

24

pudicizia bleu l'è in pericol — ma el pòpol l'ha respettada — l'è staa vertuos.

A trè or dòpo mèzza nòce tùcc sti deputatèss even in lècc — i mari, i fradèj, i cugnaa, i papà, i amis, i confidènt, eren infolar-maa a convertì ste peccatrici, che per dàgh ascolto al sciur C. A. tentaven de ribellàss contra i deritt i pu sacrosanti de la natura.

El tèrz librett el sarà:

A MORIVION



**SU I DONN**

**GIO' I OMEN**

**PRIMA SCÈNA COMICA**

**CHE SPUELL!**

**NORMA DELLA PUBBLICAZION.**

Saràn cèrti opuscolètt, che vegnaràn publicaa denter per denter, e minga periodich, al prèzzi de 55 centèsem l'un.

Chi se obbligarà a comprà quatter de sti libritt, no pagará che *ona lira austriaca*, e quánd sien associaa alla *Storia de Milàn*, che la sèguita a andà innanz pagaràn appèna centèsem 75.

In Milàn se venden in contrada de santa Margarita al N. 1121. — in contrada di Restej al burò di giornàj — e in di olter libree.

Fœura de Milan in di principàj libree.